

## YE HAI KHWAJA KA HINDUSTAN

Ye hai Khwaja ka Hindustan Mere Khwaja ka Hidustan  
Is ke liye gar waqt pada to de denge hum Jaan  
Ye hai Khwaja ka Hindustan Mere Khwaja ka Hidustan  
Isi mein hai hum sab ki Izzat aur Hamaari Shaan  
Ye hai Khwaja ka Hindustan .....

Fazle Khuda aur Faize Nabi se Qil e Shirk Ukhaada tha  
Aakar Khwaja ne Ajmer mein deen ka jhanda gaada tha  
Hind ki dharti par jitne bhi deen ke dushman rehte the  
Allaahu ki Zarb laga kar har zaalim ko pachhaada tha  
Jis ne bhi dekha Aap ko Khwaja le aaya Imaan  
Ye hai Khwaja ka Hindustan .....

Yahin pe Khwaja Saeed Fakhruddin Hishaamuddin bhi hai  
Yahin pe Qutbuddin Nizaamuddin Alauddin bhi hai  
Yahin pe Shamsuddin Altamash Yahin Naseeruddin bhi hai  
Yahin pe Sharfuddin Maneeri Sufi Hameeduddin bhi hai  
In sab ki chaukhat se bat-ta hai Jaam e Irfaan  
Ye hai Khwaja ka Hindustan .....

Yahin pe Mas'ood e Gazi ne apne sar ko kataaya hai  
Yahin pe Makhdoom e Ashraf ne parchame Haq lehraaya hai  
Yahin pe Haji Ali o Haji Malang o Makhdoom e Maahim  
Waaris Meena Baba Tajuddin ka hum par saaya hai  
In sab ki azmat pe karun main tan man dhan Qurbaan  
Ye hai Khwaja ka Hindustan .....

Yahin pe Aalahazrat bhi hai aur yahin Marehra hai  
Abde Waahid ka Ahlesunnat par aaj bhi pehra hai  
Haamid o Ibrahim Raza o Rehaan e Millat bhi hai  
Noori Miyaa ki Noori Kiran se Raushan Sab ka Chehra hai  
Mufti e Aazam ka har ek Sunni par hai Ehsaan  
Ye hai Khwaja ka Hindustan .....

## BAQA E JAAVIDAAN SAABIR

Baqa e Jaavidaañ tum ho Ameer e Aashiqaañ Saabir  
Tumhaare Naam Haiñ Wirde Zubaan e Aarifaañ Saabir

Tumhaari Rif'atoñ ki had nahiñ ma'loom Aalam ko  
Tumhaari Sair ki hai Ibteda Az La Makaañ Saabir

Tajalli Gaah e Yazdaañ ho Mujassam Noor e Haq Saabir  
Sareer e Mulk e Yazdaañ par Tera Hukm e Rawaañ Saabir

Ajab Hungama woh Shorish Zamaane bhar mein Saabir ke  
Tamaasha Gaahe Aalam hai Tumhaara Aastaañ Saabir

Tumhaara Kuchaye Irfaan hai ek Toor ka tukda  
Jahaañ par us Tajalli ka Abhi Tak hai Nishaañ Saabir

Jahaañ Sau Khuld ka Manzar Zameeñ woh Quds Kalyar hai  
Chaman Zaare hawiyat mein Nihaañ tum ho yahaañ Saabir

Tumhaare dar se mangta par nawaazish ka ye aalam hai  
Bhikaari ban ke jaata hai Shahenshaah e Jahaañ Saabir

Wilaayat hai Muheet Aalam e Arwaah-e-Baala ko  
Ke Tum ho Khaatim e Arwaaho Shaah Do Jahaañ Saabir

Tumhaari Sair hai Fillaah Tumhaara Auj hai Billaah  
Fanaa ki Ibteda Tum ho Baqaa ki Daastaañ Saabir

Fuyuze Aalime Ummi se tu Faiyyaaz e Aalam hai  
Fuyuze La Takhaf Paaye Gadaaye Aastaañ Saabir

Tumhaare rukh ki taabaani jo aalam taab baatin hai  
Tumhaare rukh ke jalwe hain shahaa mehr e tabaañ Saabir

Tumhiñ Sarve Gulistaane Ali ho Baab e Wahdat ka  
Tumhiñ Usmaan Umar Bu Bakr ki Umre Rawaañ Saabir

Nabi ka laadla Shaan e Ali Hasnain ka jalwa  
Nigaar e dast e qudrat ka ajab mo'ajiz nishaañ Saabir

Woh chamki soorat e khursheed si ek doosri soorat  
Tumhaare nakhun e paa haiñ shaha badr e tabaañ Saabir

Meri Tum tak rasaai to nahiñ lekin rasaai hai  
Tumhaari har jagah har aan Tum faiz e rawaañ Saabir

Kamaan e iqtedar e kun makun haasil huwa tum ko  
Tumhaare haath haiñ kaunain ke donoñ kamaañ Saabir

Jalaal e Haq Ta'ala zill e zaat e kibriya tum ho  
Kamaal e haidari mein tum yagaana yaknishaañ Saabir

Bahaar e gulshan e imkaañ naseem e khuld e irfaañ ho  
Saraapa Rehmat e Aalam ka behr e bekaraañ Saabir

Munawwar Chashmahaaye Auliya haiñ Khaak Kalyar se  
Tumhaari reh guzar bhi kya hai Kuhl e Aarifaañ Saabir

Suroor e dil tum hi tum ho qaraar e jaañ tum hi tum ho  
Fuyooz e Jaavidaañ tum ho sukoot e laamakaañ Saabir

Sagaane Kuchaye Dar Ki Tamanna Hirso Laalach Hai  
Miley Us Khwaan Ka Chhora Hua Ek Ishtikhwaañ Saabir

Hamaari Daad Tum Fariyaad Tum Aur Reham Farma Tum  
Hamaari Aabru Tum Aasraa Tum Jaane Jaañ Saabir

Tumhaare dar pe reh ke door tum se haaye majboori  
Ke uftaada zameeñ maiñ tum siraj e laamakaañ Saabir

Banaalo apna qaidi aur rihaayi do zamaane se  
Phirooñ kab tak zaleel o khwaar dar dar be amaañ Saabir

Dikhaade roo e anwar ki jhalak ab to gulaamoñ ko  
Banaa madhosh e ulfat aur mita sab een o aañ Saabir

Tajalli Dekh Luñ Teri Fanaa Hoka Miluñ Tujh se  
Dikha Kaliyar Meiñ Phir Mujhko Wahi Daur o Zamaañ Saabir

Tawaafe Koochaye dar ko Fanaa ki Ghaat Yuñ Samjha  
Tumhaari Deed hai Waj-he Baqaaye Jaawidaañ Saabir

Maiñ tanha kaam ke qaabil kahañ hooñ tum agar chaaho  
Jahañ meiñ ek jahañ e nav ho paida ho jo haañ Saabir

Raza o Haamid o Noori ki nisbat ki badaulat hi  
Tumhaara faiz hai yaaraane Noori par ayañ Saabir

Maiñ kaise jee raha hooñ daur kaisa pur fitan aaya  
Sitam kori wahaabi ki karooñ kya kya bayaañ Saabir

Dikha Mujhko Hareeme Ashiqaañ Tu Bazme Baala meiñ  
Wahañ Midhat ko ho **ARSHI** Zabaan e Aashiqaañ Saabir

### **AHMED RAZA KA TAAZA GULISTAAÑ HAI AAJ BHI**

Ahmed Raza ka Taaza Gulistaañ hai aaj bhi  
Khursheed Ilm un ka darakshaañ hai aaj bhi

Tum kya gaye ki Raunaq e Mehfil chali gayi  
Sher o Adab ki zulf pareshañ hai aaj bhi

Kis tarah itne ilm ke dariya bahaa diye  
Ulma e Haq ki aql to hairaañ hai aaj bhi

Khidmat Quraan e Paak ki wo la jawaab ki  
Raazi Raza se Saahib e Qura'añ hai aaj bhi

Sab un se Jalne Waaloñ ke Gul ho gaye Charaag  
Ahmed Raza ki Shama Farozañ hai aaj bhi

Lillaah apne Faiz se ab kaam lijiye  
Fitnoñ ke Sar Uthaane ka Imkaañ hai aaj bhi

**MIRZA** Sare Niyaaz jhukaata hai is liye  
Ilm o Amal pe aapka ahsaañ hai aaj bhi

### **JAANE MURIDAAÑ SHAMA E HIDAAYAT**

Jaane Muridaañ Shama e Hidaayat Mufi e Aazam Zindabad  
Aap pe Qurbañ Ahle Aqeedat Mufi e Aazam Zindabaad

Aap Saraapa Rushd o Huda haiñ, partave Haamid Zille Raza haiñ  
Aap ko Zeba Taaj e Wilaayat Mufti e Aazam Zindabaad

Aqwaal o Af'aal meiñ Noori, Noori haiñ har haal meiñ Noori  
Noori Soorat, Noori Seerat Mufti e Aazam Zindabaad

Aalimo Faazil, Rehbar e Waasil, Peer o Wali Sultaan e Amaasil  
Yaani Ibn e Aala Hazrat Mufti e Aazam Zindabaad

Aap haiñ toote diloñ ke sahaare, Milte haiñ aap se pyaar ke dhaare  
Ye hai Mohabbat Ye hai Shafqat Mufti e Aazam Zindabaad

Maangne wala Sab kuchh paaye, Rota aaye Hañsta Jaaye  
Ye hai un ki adna karaamat Mufti e Aazam Zindabaad

Aaya hai **SULTAAÑ** aap ke dar par apna khaali daaman lekar  
Aap ka hai Mohtaaj e Inaayat Mufti e Aazam Zindabaad

### **ADAAYE MUSTAFA TUM HO**

Adaaye Mustafa tum ho, Raza e Mustafa tum ho  
Har ek Atwaar se aye Muqtada Ahmed Raza Tum ho

Shabeehe Hazrat-e-Gausul Wara Ibne Raza Tum ho  
Jahaan e Ilm ke Mufti e Aazam Mustafa Tum ho

Wali Ibne Wali Zinda wali ho Paarsa Tum ho  
Saraapa Zohd ho aur paikare Sidq o Safaa Tum ho

Pilaa do Jaame Noori Apni Nooraani Nigaahoñ se  
Ke Noori Maikada hai aur meer e saaqiyaañ tum ho

Kisi ko kyuñ Sunaoñ daastaañ apne masaaib ki  
Mere dukh ki dawaa tum ho Mere Mushkil kusha tum ho

Mujhe Taufeeq e Sabr o Isteqaamat Bakhsh de Aaq  
Mujassam Isteqaamat paikar e Sabr o Raza Tum ho

Usi meethi nazar se dekh lo phir apne mangtaa ko  
Ke iski Aarzu Hasrat Tamanna Mudda'aa Tum ho

Tumhaari Zaat mein jalwe Raza, Haamid Raza ke haiñ  
Mere Haamid Raza tum ho Mere Ahmed Raza Tum ho

Wo Mere Saamne haiñ poochhte haiñ Aarzu kya hai  
Mere Maula Zubaañ dede to kehduñ Mudda'aa Tum ho

Sakhi tum ho maiñ Saail hooñ Wali tum ho maiñ Aasi huñ  
Mareez e Dard e Isyaañ huñ Dawaa tum ho shifa tum ho

**RAZA O HAAMID O NOORI** ka gulshan hai bahaaroñ par  
Shagufta is chaman mein Khair se **REHAAÑ RAZA** Tum ho

### **MUFTI E AAZAME AARIF E BAA SAFAA**

Mufti e Aazame Aarif e Baa safaa Aabid e Beriya Mustafa Shah Raza  
Mazhare Shaane Gausul wara Haiñ Raza Aur Zille Raza Mustafa Shah Raza

Jaan to Jaan hai Maan to Maan hai, Ishqe Ahmed to Imaan ki Jaan hai  
Ye jo Najdiye Bey Deeno Imaan hai Tum ne sikhla diya Mustafa Shah Raza

Har Sajaawat Fida Saadgi par teri, Sadqe hoñ sau chaman ek hañsi par teri  
Jaan Vaare Sukhan Khaamoshi par teri, Baat hai Teri Kya Mustafa Shah Raza

Kitne Zarroñ ko khursheed e Taabaañ kiya, Kitne Qatroñ ke behre be paayaañ kiya  
Kitne Soone banoñ ko Gulistañ kiya, Waah Faiz e Raza Mustafa Shah Raza

Kitne rote hañse, kitne sote jage, Kitne girte uthe, kitne doobe tirey  
Jab Dua ke liye haath uthe aap ke, kya se kya hogaya Mustafa Shah Raza

Joshe Toofaañ tha Nakhuda chal basaa, Raah pur kham thi aur Rehnuma chal basaa  
Ya Khuda Reham bar haale maa chal basaa, Muqtada Rehnuma Mustafa Shah Raza

Zulm e Kuffaar e Naari se kyuñ wo darey Taaqat e deve najdi se kyuñ wo darey  
Bad Aqeedaa Wahaabi se kyuñ wo darey jo tera hogaya Mustafa Shah Raza

Dil hai bekal zara haath rakh dijiye, Lutf o Shafqat bhara haath rakh Dijiye  
Ho ye khota khara haath rakh dijiye, Behre Gausul Waraa Mustafa Shah Raza

Maqta e Dil Nasheen Naadim e Zaar ne Is tarah keh ke bas apne lab see liye  
Shaan Ahle Baseerat hi jaanein teri Kya main kya muñh mera Mustafa Shah Raza

### **RAZA KA CHAMAN**

Aaj ikattha haiñ Daanishwaraane Watan  
Yaani Ulma o Sho'ara o Fikr aur fann  
Saahibaan e Nazar Haasil e Anjuman  
Nuqta daanoñ Faseehaan e Ahle Sunan  
Hai Adeebo Khateebo Zabaano Sukhan  
Ye Raza Ka Chaman hai Raza ka Chaman

Azmat e Sidq Siddeeq e Akbar liye  
Adl e Farooq e Aazam ka Mazhar liye  
Sabr e Usmaañ Gani ka Samandar liye  
Quwwate Daste Baazu e Haider liye  
Nikhat e Rang e Hazrat Husain o Hasan  
Ye Raza Ka Chaman hai Raza ka Chaman

Is mein Ajmeri Khwaaja ki hai Khwaajgi  
Sayyed Mas'ood e Gaazi ka Gulshan yahi  
Ye hai Phulwaari Ashraf Jahaangeer ki  
Rang o boo e Bareilly o Marehravi  
Is pe Saaye figan panja e panjatan  
Ye Raza Ka Chaman hai Raza ka Chaman

Is mein Sayed Mohammed Kichhouchha ki shaan  
Mufti Abdul Hafeez Aagra ki haiñ Jaan  
Is mein Haafiz e Millat ki Misbaahi Aan  
Aur Mujaahid e Millat Habeeburrehmaan  
Saadgi Jis pe Qurbaan har baañkpan  
Ye Raza Ka Chaman hai Raza ka Chaman

Is mein Haji Ali is mein Haji Malang  
 Saare Dariya Samandar Pahaad is ke sang  
 Shah Meena ki Sehba ka josh o umang  
 Waaris e Paak ka Zaafrān Zaar Rang  
 Gul Badaama Gul Afroz Gul pairahan  
 Ye Raza Ka Chaman hai Raza ka Chaman

Fazl e Haq Khairabaadi ka is mein Usool  
 Is ke Haami Badaayun ke Fazl e Rasool  
 Shaahe Marehravi Syed Aale Rasool  
 Kar liya Peer Apna Raza ne Qubool  
 Is liye is pe Naazān haiñ Ahle Sunan  
 Ye Raza Ka Chaman hai Raza ka Chaman

Is mein Ilm e Aleemi Naimi Sifaat  
 Mehr o Maahe Shari'at ke Din aur Raat  
 Haamidi Amjadi Mustafaayi Hayaat  
 Is mein Simti huwi be qaraan Kaaynaat  
 Is mein Dasht o Jabal Behr o bar Baag o Ban  
 Ye Raza Ka Chaman hai Raza ka Chaman

Mustafa ke Raza ki bahaarein liye  
 Lalao Gul Lahakte Mahakte huwe  
 Jagmagaate charaagaan pe Noori diye  
 Noor hi Noor hai jis taraf dekhiye  
 Noor ki Sham'a hai Noor ki Anjuman  
 Ye Raza Ka Chaman hai Raza ka Chaman

Dekho Ahmed Raza Khan ke nezey ki maar  
 Ho gaya jis se A'ada ke seeney mein gaar  
 Hashmati Sher beshaye Sunnat ka waar  
 Bach ke jaane na paaye wahaabi shikaar  
 Zarbe Sadrush Shari'ah hai baatil Shikan  
 Ye Raza Ka Chaman hai Raza ka Chaman

Is ke Rehān ki **AJMAL** mahak char su  
 Is ke Akhtar ki Azhar minash Shams khu  
 Ya Ilaahi Salaamat rahe mu ba mu  
 Mufti e Aazam e Hind ki Aabru  
 Hai Duaon mein masroof Ahle Sunan  
 Ye Raza Ka Chaman hai Raza ka Chaman

## AUR PHOOLE PHALE YE RAZA KA CHAMAN

Sayyidi Murshidi Jaan e Ahle Sunan  
 Pur bahaar in se haiñ Gulshan e Ilm o Fann  
 Dur in se rahein Saare Ranj o Mihan  
 Hai Meri Itija Tujh se aye Zul Minan  
 Aur Phoole Phale Ye Raza Ka Chaman.....

Jin ke Deedaar se Yaad aaye Khuda  
 Jin ki Aankhon mein hai Jalwa e Mustafa  
 Zille Gausul Wara Aqs e Ahmed Raza  
 Haami e Be Kasān Murshid e Baa Safaa  
 Un ke Chehre se phoote haiñ Noori Kiran  
 Aur Phoole Phale Ye Raza Ka Chaman.....

Muskura dein to kaliyaan dilon ki khilein  
 Aarzuon ke bujhte diye Jal uthe  
 Jis ki taskeen se rotey huwe haans padey  
 Be Sahaaron ki Aasaan ho Mushkilein  
 Phool Jhadte haiñ honton se waqt e Sukhan  
 Aur Phoole Phale Ye Raza Ka Chaman.....

Dasht e Gurbat zadaa Laalaazaar in se hai  
 Bekason ki khizaan mein bahaar in se hai  
 Be Qaraaron ke dil ka Qaraar in se hai  
 Ahlesunnat ka Sultaan Wikaar in se hai  
 In pe Sadqe Hamaare Dil o Jaan o Tan  
 Aur Phoole Phale Ye Raza Ka Chaman.....

Daulatein Maangne wale paate rahein  
 Aayein rote huwe haans ke jaate rahein  
 Bazm e Naat e Nabi ye Sajaate rahein  
 Aur Hum Manqabat in ki Gaate rahein  
 Mere Aaqā rahein yun hi jalwa figan  
 Aur Phoole Phale Ye Raza Ka Chaman.....



